

Il Gambun en Sin Cadruvi

da pader Baseli Berther

Tuttenina semida la posiziun dils buobs. Da vitg en vegn in um vegl cun ina truca si dies ed in canaster en bratsch. Plein legria cloman ils buobs: El Gambun, el Gambun! el o da vender tschareischas! – Tgi seregorda buca cun legherment ed engraziament da quei brav um vegl, che ha fatg tons plaschers als affons da nossa vischnaunca? Pign mument e quasi tuts ils buobs, sco era beinenqual femna e surtut igl aug Luis, in um vegl, che magliava bugen tschereschas, circumdeschan il bien Gambun. El haveva priu plaz osum il baun sur casa da scola. La truca cotschna en fuorma da turnister, tschent'el ad interim sut il baun en.

El arva si il canaster. Bialas tschereschas cotschnas tarlischan ord quel. Beinduras tunschev'el vi ina ni l'otra als buobs per schar schigliar e far la queida aunc pli gronda. Ils buobs eran denton ils plirs svani denter ils umens per encurir si il bab. Beinsavend tgei quei s'approximar schi beinschit hagi da dir, haveva il bab, ni era il bien padrin – aunc oz engraziell jeu persuerter! – priu ora la buorsa e dau enzacons raps per schar comprar tschereschas.

Tgei tschaffen! Per tschun raps in pugn plein, per diesch raps dus pugns ed aunc in per suren. Aschia eran quasi tuts ils buobs vegni tier tschereschas, ch'els havevan schau metter en lur capetscha ni capiala. Els stevan ussa leu entuorn cun in ni l'auter da lur fargliuns e magliavan quei custeivel fretg en cumpleina cuntentientscha. Gambun haveva bien cor e saveva con bugen ils buobs havevan tschereschas. El deva buna mesira ed ils buobs fuvan era adina cuntents cun quei ch'el deva. Enqual femna e magari era aunc igl aug Luis, che astgavan spender in tec dapli, havessen marcadau bugen da far dar enzacontas dapli. Mo Gambun scheva cuortamein: Ju sa betga da per nuet; ju stu i gliunsch per ellas. Nua? – a Perdomet! – Nus buobs tertgavan, Perdomet seigi aschia in liug, sco la tiara dall'empermischun, danunder che quels dus buns umens han purtau quella gronda trocla sin in pal.

Gambun fuss atgnamein staus dalla Val Calanca, ha giu fatg la ventira cun maridar ina da Tujetsch, ina Nell, il bab dalla quala, in fravi, fuss vegnend enneu da S. Pieder el Vorarlberg. Siu fegl ha giu maridau ina da Perdomet e quella haveva sper auter survegniu per dota enzacons tscherschers ed a quella buna dunna havessen nus atgnamein d'engraziar per quei prezius fretg. Gambun era in um vegl cun caultschas cuortas, cassacca blava e purtava per ordinari ina capiala bergamasca cun flisella cotschna entuorn. El tschintschava plaun, empau tral nas, mo haveva in oreifer bien humor. Gl'unviern mava el per las casas, fageva e pinava canastras schi ditg sco enzatgi leva. Denteren raquintava el da tuttas sorts legras historias, aschia ch'el era adina beinvegnius, cunzun als affons. Havessen sias historias buca finiu quasi adina culs medems plaids: Ed a mi han ei dau ina cul caz giu pil dies . . . ni a mi han ei dau in pei . . . e catschau en tiel D. B. e fatg pinar si sias canastras nauschas, sche havessen ins bunamein pudiu crer, che tut seigi sontga verdad. Er'ei empau da quiet en stiva e tschintschavan la gliעד pauc, sche deva el tuttenina ina ferma sturnidada, che tut siglieva agrads. Quei deva nova veta.

La jamna sontga mav'el adina a Cuera per il s. ieli e purtava quel per l'entira Surselva si, ils emprems onns entochen vi d'Ursera – ina honur e favur, ch'era siu fegl ha gudiu e la quala siu beadi gauda ussa. Pilver, ina honoreivla caussa per quella brava famiglia. El ruaussi en pasch, il bien Gambun!